

პროფესიული განათლების სისტემა საქართველოში

ია ძეზისაური
სტუდენტორანტი

რეზიუმე

საქართველოში პროფესიული განათლების მიზანია ქვეყნის ეკონომიკური განვითარების, სოციალური ინკლუზიის, მთელი ცხოვრების მანძილზე ინდივიდის პიროვნული და პროფესიული განვითარების ხელშეწყობა. ამასთან, მისი ამოცანაა შეავსოს შრომის ბაზარზე, კვალიფიციურ კადრზე მოთხოვნა-მიწოდება შორის არსებული დისბალანსი, რასაც სისტემა უზრუნველყოფს დამსაქმებელთა აქტიური მონაწილეობით საგანმანათლებლო პროგრამების ფორმირებისა და მიწოდების ეტაპზე. შესაბამისად, პროფესიული განათლების განვითარებისათვის საჭირო მრავალ ინსტრუმენტს შორის, განსაკუთრებული ადგილი უჭირავს კერძო სექტორის მონაწილეობის წახალისებას, საჯარო-კერძო პარტნიორობის გზით. პროფესიული განათლება საგანმანათლებლო სისტემის მნიშვნელოვანი ნაწილია და მისი მიღება შესაძლებელია საშუალო, საშუალოს შემდგომ და უმაღლეს სასწავლებლებში. იგი ამზადებს განათლებულ და მოქნილ მუშახელს, რომელსაც უმაღლეს განათლებასთან შედარებით, უფრო კარგად შეუძლია შრომითი ბაზრის არსებულ და მუდმივად ცვალებად საჭიროებებთან გამკლავება. პროფესიული სასწავლებლების კურსდამთავრებულებს შეუძლიათ სერიოზული კონკურენცია გაუწიონ შრომით ბაზარზე უმაღლესი სასწავლებლების კურსდამთავრებულებს, რაც ეკონომიკური და სოციალური განვითარებისთვის აუცილებელი პირობაა.

საკვანძო სიტყვები: პროფესიული საგანმანათლებლო პროგრამები; პროფესიული განათლება; ადამიანური კაპიტალი, დასაქმება, კონკურენტუნარიანობა, სოციალური წარმატება.

VOCATIONAL EDUCATION SYSTEM IN GEORGIA: RESUME

Ia Dzebisauri
PhD student of GTU

RESUME

The purpose of vocational education in Georgia is to promote the country's economic development, social inclusion, and the entire life of the individual's personal and professional development. However, its task is to fill in the labor market, the imbalance between the qualified footage demand and supply, which the system ensures the formation and delivery of educational programs with the active participation of employers. Consequently, among the many tools needed for the development of vocational education, it is a special place to encourage the participation of the private sector

through public-private partnerships. Vocational education is an important part of the educational system and can be obtained in medium, secondary and higher education institutions. It prepares an educated and flexible workforce that, compared to higher education, is better able to cope with the existing and constantly changing needs of the labor market. Graduates of vocational colleges can compete with graduates of higher education institutions in the labor market, which is a necessary condition for economic and social development.

Keywords: Vocational education programs; Vocational education; Human capital; Employment; Competitiveness; Social Success.

* * * *

დღევანდელი ქართული პროფესიული განათლების სისტემა მნიშვნელოვანი გამოწვევების წინაშე დგას, – უზრუნველყოს მაღალი ხარისხი, ხელმისაწვდომობა, მოიზიდოს და დააინტერესოს პროფესიული გადამზადების მსურველები, მოამზადოს კვალიფიციური კადრები. პროფესიული განათლების სისტემამ სტუდენტებს აქტიურად უნდა დაუჭიროს მხარი ყველა ეტაპზე: სწავლის დაწყებამდე, სწავლის პროცესში და სწავლის დასრულების შემდეგაც.

საქართველოში წინა წლების მდგომარეობას თუ შევადგას, გასათვალისწინებელია საგანგებო გარემოება, რომელიც უკავშირდება Covid-19 ვირუსით გამოწვეულ პანდემიას. სწორედ კურსდამთავრებულებისათვის პოტენციურ სამუშაო პერიოდში (2020 წელს) დაიხურა საწარმოები, შეჩერდა დიდი და მცირე ორიგანიზაციების მუშაობა, ამან რა თქმა უნდა შეამცირა ერთი მხრივ სამუშაო ადგილები, და მეორე მხრივ დასაქმების მძებნელთა მოტივაცია და მცდელობები, რაც მკაფიოდ იკვეთება მონაცემებიდან. კურსდამთავრებულებში წამყვანი იყო ტენდენცია თავი შეეკავებინათ სამსახურის ძიებისა და სამუშაოს დაწყების მცდელობებისაგან არსებული პანდემიური მდგომარეობის გამო. [1]

ევროკომისია, 2016 წელი - ევროპის ახალი უნარების დღის წესრიგის ანალიტიკური საფუძველი აღნიშნული დოკუმენტი წარმოადგენს შემდეგი დოკუმენტის თანმხლებს - „ახალი უნარების დღის წესრიგი ევროპისთვის: ვიმუშავოთ ერთად ადამიანური კაპიტალის, დასაქმებისა და კონკურენტუნარიანობის გაძლიერებისათვის“. დოკუმენტის მიზანია საკითხების ზოგადი მიმოხილვა და ამ ინიციატივისთვის არსებული მტკიცებულებების ბაზისის წარდგენა. ეს სამუშაო დოკუმენტი ყურადღებას ამახვილებს მთავარ პრობლემებსა და საკითხებზე, რომლის წინაშეც დგას ევროკავშირი ადამიანური კაპიტალისა და უნარების საჭიროებასთან მიმართებაში (რომლებიც მოცუ-

ლია ევრო-კომისიის შეტყობინებაში) და განმარტავს თუ რატომ არის და იქნება ევროპის ეკონომიკა და სოციალური წარმატება მეტწილად დაფუძნებული მოსახლეობის უნარებზე. რიგის დასკვნები, 2015 წელი შუალედურ და ახალ შედეგებზე პროფესიული განათლების სფეროში 2015-2020 წლების პერიოდისათვის, როგორც 2010 წ.-ის ბრიუგეს კომუნიკეში განსაზღვრული მოკლევადიანი შედეგების მიმოხილვის შედეგი. პროფესიული განათლების რეფორმის ფარგლებში ერთ-ერთი მნიშვნელოვანი ამოცანაა პროფესიული განათლების სისტემის ევროპულ საგანმანათლებლო სივრცესთან თავსებადობის უზრუნველყოფა. რისთვისაც მუშაობა ჯერ კიდევ 2015 წლიდან დაიწყო. ამ მიმართულებით 2019 წელს მნიშვნელოვანი ნაბიჯები გადაიდგა, როგორც კვალიფიკაციების თავსებადობის, ასევე პროფესიული განათლების დამადასტურებელი დოკუმენტების „EUROPASS“-ის დოკუმენტებთან შესაბამისობაში მოყვანის კუთხით. რიგის აღმოსავლეთის პარტნიორობის სამიტის დასკვნები წარმოადგენს პროფესიული განათლებისა და გადამზადების როლს განვითარების, სამუშაოს ადგილების დღის წესრიგისა და განათლებასა და გადამზადებაში ევროპული თანამშრომლობის სტრატეგიული ჩარჩოს კონტექსტში (ET 2020). ახალი მიზნები/შედეგები ამყარებს 2020 წლის ხედვას პროფესიული განათლებასა და გადამზადებაზე და ასევე ხელს უწყობს ძირითად გამოწვევებსა და სამომავლო პროგრესს. 2017 წელს მომზადდა განათლებისა და მეცნიერების ერთიანი სტრატეგია (2017-2021წწ), რომელიც ეფუძნება განათლებისა და მეცნიერების სფეროში განხორციელებული რეფორმების მიღწევებისა და გამოწვევების ანალიზს. სტრატეგია მოიცავს სისტემის ყველა მიმართულებას: ბავშვთა ადრეული/სკოლამდელი აღზრდა და განათლება, ზოგადი, პროფესიული და უმაღლესი განათლება, ზრდასრულთა განათლება, მეცნიერება და კვლევები. სტრატეგია დამტკიცებულია საქართველოს პრემიერ-მინისტრის მიერ (ბრძანება N533 07.12.2017) და ხორციელდება შესაბამისი სამოქმედო გეგმის საფუძველზე. [2]

პროფესიული განათლების სფეროში საქართველოს კანონმდებლობა ეფუძნება საქართველოს კონსტიტუციას, საერთაშორისო ხელშეკრულებებსა და შეთანხმებებს, ამ კანონს და სხვა ნორმატიულ აქტებს. [3]

საქსტატის მონაცემებით, 2020 წელს, 2019 წლის მაჩვენებელთან შედარებით, პროფესიულ სასწავლებლებში მიღებულ სტუდენტთა რაოდენობა 18.5 პროცენტით შემცირდა და სულ 9 399 შეადგინა. პროგრამების მიხედვით კი, ჩარიცხული სტუდენტების რაოდენობა შემდეგნაირად ნაწილდება: საინფორმაციო და საკომუნიკაციო ტექნოლოგიები – 12.4 %; ჯანდაცვა, სოციალური კეთილდღეობა – 20,8 %; ინჟინერია, წარმოება, მშენებლობა – 20,4 %; ბიზნესი, ადმინისტრირება და სამართალი – 14,8 %; მომსახურებები – 18,1%; სხვა- 13,5 %;

საქსტატის მონაცემებითვე, 2020 წლის ბოლო-

სთვის, საქართველოში 92 საგანმანათლებლო დაწესებულება (აქედან 40 საჯარო, ხოლო 52 კერძო) ფუნქციონირებდა, რომლებიც ახორციელებდნენ სტუდენტების მიღებას პროფესიულ საგანმანათლებლო პროგრამებზე. [5]

ბოლო წლებში, გაუმჯობესდა პროფესიულ განათლებაზე ხელმისაწვდომობა, სახელმწიფო პროფესიულ საგანმანათლებლო დაწესებულებებში სწავლა სრულად ფინანსდება სახელმწიფოს მიერ. დაარსდა ახალი კოლეჯები, განახლდა კოლეჯების სასწავლო კორპუსები და ინფრასტრუქტურა ინკლუზიური განათლების პრინციპების გათვალისწინებით ადაპტირდა შშმ პირებისათვის. ეროვნულ უმცირესობებს შესაძლებლობა აქვთ პროფესიული ტესტირება მშობლიურ ენაზე ჩააბარონ. დაიწყო მოკლევადიანი პროფესიული კურსების განხორციელება სამუშაოს მაძიებელთათვის, მსჯავრდებულთა და ყოფილი პატიმრებისთვის.

პროფესიული საგანმანათლებლო პროგრამების კურსდამთავრებულების დასაქმება ყველაზე მნიშვნელოვანი ცვლადია ერთი მხრივ პროგრამების ეფექტიანობის შეფასებისა და მეორე მხრივ ინდივიდის პროფესიული განვითარებისა და მისი მხარდაჭერის თვალსაზრისით. დაამყარონ კონტაქტი მათთან, გაიაზრონ პროფესიის შესაძლებლობები და დაგეგმონ საკუთარი პროფესიული განვითარება. [4]

ჩვენს საზოგადოებას ბოლომდე არ აქვს გაცნობიერებული პროფესიული განათლების უპირატესობები. აბიტურიენტების უმრავლესობა პროფესიის არჩევის დროს არაინფორმირებულ გადაწყვეტილებას იღებს, რაზეც გავლენას ახდენენ სხვა პირები, განსაკუთრებით კი მშობლები. უმაღლესი განათლება, უმეტესობას სჭირდება სოციალური სტატუსის ასამაღლებლად, საზოგადოების კეთილგანწყობის მოსაპოვებლად. პროფესიული განათლება კი ზოგად და უმაღლეს განათლებასთან შედარებით მეორეხარისხოვან ალტერნატივად განიხილება.

მიუხედავად სახელმწიფოს მხრიდან, ბევრი წინადადებული ნაბიჯისა, პროფესიული განათლების სისტემის შესახებ მწირი ინფორმაცია მშობლებისა და მასწავლებლების მხრიდან, ერთ-ერთ მთავარ დაბრკოლებად რჩება, პროფესიული განათლების სისტემის გაფართოების თვალსაზრისით. ვერ ხდება აპლიკანტების მოზიდვა სკოლების საბაზო საფეხურიდან. ამიტომ მნიშვნელოვანია პროფესიული განათლების სტატუსისა და იმიჯის გაუმჯობესება. პროფესიული განათლება უნდა გახდეს პირის კარიერული განვითარების რეალური, პრესტიჟული და ღირებული გზა.

პროფესიული განათლების მიმზიდველობის გასაზრდელად მუშაობა რამდენიმე მიმართულებით უნდა წარიმართოს როგორიცაა: პროფესიული სტუდენტების წარმატებით დასაქმების შესახებ ინფორმაციის გავრცელება, ცნობიერების ამაღლების კამპანიების მოწყობა პროფესიული განათლების

პერსპექტივებისა და უპირატესობის შესახებ. ცნობიერების ამაღლების ღონისძიებების მიზანი უნდა იყოს როგორც სამიზნე ჯგუფების ინფორმირება, ასევე პროფესიული განათლების მიმართ მოსახლეობის დამოკიდებულების შეცვლა. იმ სარგებლიანობის შესახებ ინფორმირება, რომელიც პროფესიულ განათლებას შეუძლია მოუტანოს საზოგადოების ნებისმიერ წევრს, განურჩევლად მისი სტატუსის თუ შესაძლებლობისა.

პროფესიულ განათლებაში განხორციელებული მნიშვნელოვანი სიახლეების თაობაზე საზოგადოების ინფორმირება და მათი დაინტერესება უფრო მიმზიდველს გახდის პროფესიულ განათლებას, რეკლამას გაუკეთებს მის სარგებელს, რაც გულისხმობს გაზრდილ დასაქმებას, სარგებელს ზოგადად დამსაქმებლებისთვის და პოტენციური სტუდენტებისთვის.

პროფესიულ კოლეჯებს გაფორმებული აქვთ მემორანდუმები პოტენციურ დამსაქმებლებთან. აღნიშნული მემორანდუმის ფარგლებში პროფესიული სტუდენტები სწავლის გარკვეულ ნაწილს გადიან უშუალოდ სამუშაო ადგილზე. მაგალითად, გიდი-ტურისტულ კომპანიაში, მზარეული – რესტორანში, სტილისტი – სილამაზის სალონში და ა.შ. შესაბამისად, სწავლის დამთავრების შემდეგ სტუდენტს აქვს პროფესიული დიპლომიც და პრაქტიკული გამოცდილებაც, რასაც ასე ხშირად ითხოვენ დამსაქმებლები. სამუშაო ადგილზე სწავლება და ბიზნესის პროცესში ჩართულობა ნამდვილად ზრდის პროფესიული განათლების მიმზიდველობას.

პროფესიული პროგრამების განვითარების მიზნით რეკომენდებულია შიდა და გარე კვლევების ჩატარება, სადაც მაქსიმალურად იქნებიან ჩართული პროფესიული განათლების ყველა დონის (მაკრო-ნანო) სუბიექტები (სტუდენტი, მასწავლებელი, ადმინისტრაციის წარმომადგენელი, პოტენციური დამსაქმებელი და ა.შ.). რეკომენდებულია პროფესიულ დაწესებულებებში მოქმედებდეს სწავლა-სწავლების ხარისხის შეფასებისა და მიმდინარე პროცესებზე უკუკავშირის სისტემა, განსაკუთრებით საყურადღებოა საჭიროებების კვლევები, რაც სამუშაოებს მისცემს სასწავლებელს მუდმივად პულსზე ედოს ხელი. რეკომენდებულია გარკვეული რეგულარულობით გადაიხედოს მოდულებისა და კურსების სილაბუსები. განსაკუთრებით პრაქტიკის ნაწილი, რადგან შრომის ბაზარზე განხორციელებული ნებისმიერი ცვლილება აისახება კომპეტენციებში. მუდმივად უნდა ხდებოდეს პროგრამებით მიღწეული კომპეტენციების შეფასება შრომის ბაზარზე საჭირო კომპეტენციებთან მიმართებაში. განსაკუთრებული ყურადღება უნდა მიექცეს პროფესიების პოპულარიზაციას და დასაქმების შესაძლებლობების შესახებ ინფორმირებულობის საკითხს. ამისათვის რეგულარულად უნდა იმართებოდეს საკომუნიკაციო ტიპის აქტივობები: ღია კარის დღე, საინფორმაციო კამპანიები, დასაქმების ფესტივალები, სადაც

პოტენციური დამსაქმებლები ისაუბრებენ მათთვის მნიშვნელოვან უნარებსა და ღირებულებებზე. შესაბამისად, ძალიან მნიშვნელოვანია სწორი ინფორმირებისა და მხარდაჭერის პოლიტიკა, რათა პროფესიული იდენტიფიკაციის მყარი საფუძვლები შეიქმნას და კურსდამთავრებულები პროფესიაში დარჩნენ. რეკომენდებულია პროფესიულ საგანმანათლებლო დაწესებულებებს ჰქონდეთ კურსდამთავრებულთა ტრანზიციის ხელშეწყობისა და მხარდაჭერის სისტემა. ამ სისტემის საშუალებით საგანმანათლებლო დაწესებულება იღებს შუამავალის როლს პოტენციურ დამსაქმებელსა და სტუდენტს შორის. რეკომენდებულია პროფესიულ საგანმანათლებლო დაწესებულებებს ჰქონდეთ პროგრამის დასრულების შემდგომი მონიტორინგისა და მხარდაჭერის (Follow up) სისტემა. რაც გულისხმობს ერთი მხრივ იმას, რომ სასწავლებლებს უნდა ჰქონდეთ კურსდამთავრებულების სრულყოფილი ბაზა და გარკვეული პერიოდულობით ხდებოდეს ამ ბაზის განახლება. ბაზაში აღრიცხული უნდა იყოს კურსდამთავრებულების პროფესიული განვითარების გზა და დინამიკა.

ზემოთაღნიშნულიდან გამომდინარე, აღსანიშნავია, რომ პროფესიულ საგანმანათლებლო დაწესებულებებში მიმართვიანობა საკმაოდ დაბალია, კოლეჯებში კონტიგენტის სიმცირეს უჩივიან, ან რომელიმე ერთ კონკრეტულ კურსზეა დიდი მოთხოვნა, მაგალითად, კულინარიის კურსებზე, რაც ალბათ ქვეყანაში კულინარიული შოუების პოპულარობამ განაპირობა. ეს გვაძლევს საფუძველს ვიფიქროთ, რომ პროფესიული განათლების, სხვადასხვა პროფესიების პოპულარიზაცია სატელევიზიო შოუებისა და სფეროში მოღვაწე წარმატებული ადამიანებისა და ორგანიზაციების წარმომადგენელთა შესაძლებელი. საქართველოში პროფესიული განათლების სისტემის სრულყოფის, მოქნილობისა და მიმზიდველობის გაზრდის თვალსაზრისით საჭიროა პროფესიული განათლება განიხილებოდეს, როგორც განათლების ერთიანი სისტემის ნაწილი და არა როგორც განათლების სისტემიდან მოწყვეტილი, განცალკევებული სფერო.

გამოყენებული ლიტერატურა:

1. საქართველოს მთავრობა, www.gov.ge (უკანასკნელად გადამოწმებულია 31.03.2023).
2. საქართველოს განათლებისა და მეცნიერების სამინისტროს ვებგვერდი, <https://mes.gov.ge/> (უკანასკნელად გადამოწმებულია 24.02.2023).
3. საქართველოს კანონი პროფესიული განათლების შესახებ <https://matsne.gov.ge/> (უკანასკნელად გადამოწმებულია 15.02.2023).
4. საქართველოს პოლიტიკის ინსტიტუტი, <https://gip.ge> (უკანასკნელად გადამოწმებულია 24.02.2023).
5. საქართველოს სტატისტიკის ეროვნული სამსახურის ვებგვერდი, <https://www.geostat.ge/> (უკანასკნელად გადამოწმებულია 25.02.2023).